

# **Pita Uqa Jaqec Je Osoldoc Anutna Dana Cajaca Jaqiaden Aqunec Je**

Pita uqa Kristen dana cajaca age hatu filfil ilagna bilein eu jaqec je i jaqiaden. Kristen eu age culumen me qee gahidoin eunu Pita uqa agena wawaga meleec gagadic mudecnu jaqec je i jaqiaden. Uqa Kristen age Jisas Kraisnu me je haun cisdoqagan ec madena. Jisas uqa cal mimei ceseli cajen. Odimeu uqa ija ceseli hugen ec maden. Pita uqa age Jisasna je hahun eunu cisdumeig uqa ceseli hocnu susumudi biluqagan ec madena.

Eu mele, Kristen age culumen gahidoin. Euqa ceteu me qee eu agena wawaga meleec temdocnu calen. Eunu age wawaga gagadic meleen lili Krais ceseli hugian. Odocob saen euna age ameg me bahic oqagan. Pita eu odi madena.

## *Je Dunuhnu Dado Mec*

1. Feele adec je (1.1-2)
2. Anut uqa egnu waug ben qumei cahahagen eunu Anut binan suluqale (1.3-12)
3. Ege gun biluqale (1.13-5.11)
  - A. Anut uqa gun eunu ege gun bileqan (1.13-2.3)
  - B. Ege wawige meleec dana cajaca egena bilec eu adi (2.4-12)
    1. Ege Anutna jo Anut uqa cehena (2.4-8)
    2. Anut uqa ege wawige meleec dana cajaca eu wele nesili cedigen (2.9-10)

3. Ege cele dana jobon filnadec cinigwe odi ege jag maha ina biluquna (2.11-12)
- C. Ege dana agena iloilo cunug bisalu biluqale (2.13-3.7)
  1. Ege kingca, gabmanca bisalu bileqan (2.13-17)
  2. Ege egena cofgec dana bisalu bileqan (2.18-20)
  3. Kraisa uqa culumen dain doc sogoecca gahidon eunu egeha odi odeqan (2.21-25)
  4. Aidagail age gemugail bisalu biluqagan (3.1-6)
  5. Gemugail age aidagail me cofaadi gami me biluqagan (3.7)
- D. Age wawaga meleec cotogail cunugnu nalunuga meigale (3.8-17)
- E. Kraisa uqa dana caja silailca eunu cal men (3.18-4.6)
- F. Ceteteh cunug qee mec saen eu cemenug nijia eunu ege kobol me odoqale (4.7-11)
- G. Ege Kraisa dain sogoecca gahidonwe odi dain sogoecca gahidoqale (4.12-19)
- H. Tamanec cofadec age Anutna dana cajaca cofadi cuhadoigale (5.1-4)
- I. Dana haun age tamanec cofadec matu bisalu bileigale (5.5-11)
4. Jaqec je i uqana gug (5.12)
5. Cit qoc je (5.13-14)

<sup>1</sup> Ija Pita, ija Jisas Kraisa aposel. Ija jaqec je i Anutna dana cajaca jaqiadigina. Age agena gug jobon culimeig Pontasca, Galesiaca, Kapadosiaca, Esiaca, Bitiniaca hatu ilagna bilegina. <sup>2</sup> Wele bahic Anut ege Memige uqa agenu wele don.

Odimeï uqa uqana cisdocna age uqana dana cajaca biluqagannu nesili cedaden. Odimeï age Jisas Kraï jejeg toodu odoqagannu nesili ehaden. Odimeï Jisas Kraï uqa golac eu bilisadu aqecb age Anut amegna soidoc tawoqagannu nesili ehaden. Eunu Anutna Kis uqa age qaguadeceb gun calein. Anut uqana eelgec uum igecca malol bilecca adeceb ageca am bec nijiale.

*Ege cebac bilec me bahic sao jobon bilia eu ocnu sumudi biluquna*

<sup>3</sup> Anut uqa egena Tibud Jisas Kraï Memeg. Eunu ege Anut binan suluqale. Uqa egenu waug ben qon. Odimeï uqa Jisas Kraï cal mecnadec tulidocb haun cajan. Uqa jic euna ege cebac bilec haun igen. Odocob cebac bilec haun eu ege gagadic migeceb ege cebac bilec catanec Anut hibna igigiannu sumudi biluquna. <sup>4</sup> Cebac bilec catanec ocnu sumudi biluquna eu Anut uqa mugumige mec eu wele saciaddon agenu cofdona, eu sao jobon bilia. Eu qee fadaleiaun, eu Anut amegna cataniec bahic bilia, eu qee qee meiaun. <sup>5</sup> Age Kraïnu wawaga meleena, eunu Anut uqa uqana gagadic odocna uqa age cahahaadigiannu cofadi cuhadona. Odocob agena cahahaadec eu saciaddon bilia eu deel cit qocna camasac mudigian.

<sup>6</sup> Age ceteħ i cunug Anut odon eunu cisdumeig ceeleigale. Euqa qila age saen nag odi dih Anut gale docobfi temadec filfil ageca caleceb sogooqagan. <sup>7</sup> Temadec ina Anut uqa agena wawaga meleec eu melefo, qeefo temdona. Age dogina, gold eu ceteħ fajecnu qaig ben bahic, euqa age

gold eu melefo, qeefo temdocnu jana manegina. Gold eu cete h fadaligian. Eunu agena wawaga meleec eu gold wooldona. Odocob temadec filfil ageca caligian saen euna agena wawaga meleec eu gagadicfo, qee, mele qeefo eu odi dugian. Odocob hibna Jisas Kraiss camasac cali hugian deel euna uqa agenu ceelime i age binanaga fuladoc benca adigian. <sup>8-9</sup> Age Jisas Kraiss qee felein qa age uqanu nalug megina. Age uqa qila qee fegina qa uqanu wawaga meleena. Agena wawaga meleec eu aig qona. Aig eu Anut uqa age dolonoga cahahadona. Odocob age uqanu cebo bahic egin. Agena ceboec eu ben bahic, eu ceboec cunug maha inadec wooldona, eu odi ege conigena qasali madecnu ihoc qee.

<sup>10</sup> Je hahun madec dana wele bilein age Anut uqa age qila bilegina cahaaadigian eunu je hahun madein. Odimeig age je i Anut uqa eeladec me bahic uum adigian ec eu gug doqagannu cabi gagadic oloig. <sup>11</sup> Kraissna Kis uqa je hahun madec dana eu age dunuh bilen. Kis eu uqa conogana Kraiss culumen dain doc sogoecca filfil gahidumei hibna binan ben fuladocca ugian ec saaden. Kis saaden saen euna je hahun madec dana age wawali sisilec cabi oin, “Cel dana uqa ege cahahagigian?” ein, odocob “Aadeb dana eu cahahagigiannu hugian?” ein. <sup>12</sup> Euqa Anut uqa je hahun madec dana eu age je hahun inu agenel cesuladecnu qee nijel ec maadeceb doin. Je hahun i agena saenna qee camasac meiaun ec maadeceb doin. Euqa agena je hahun eu Anut uqa age qila hatu ilag bilegina eundec cahaaadigiannu maden. Anut uqa Kis Gun sao

jobondec suldocob nen. Odocob dana sos age Kis Gunna gagadic odocna Jisas Kraisnu me je qasali maadecebil doin. Ensel ageha Anut uqa adi uqana dana cajaca cahahaadigian ec foqagannu gale adena.

*Anut uqa ege gun bilecnu utagen*

<sup>13</sup> Eunu age agena cisdoc tutuc mudimeig dumanaga cofdu cuhadu bileigale. Age agena cisdoc cunug gabandumeig Jisas Krais camasac cali hugiannu sumudeigale. Odocob age Anut uqa eeladec me bahic saen euna uum adigiannu gaid cisdoigale. <sup>14</sup> Age mel sim je toodu odoginawe odi odoigale. Wele age docca qee, odocob age wawaga cajecna kobol toodu odoloig. Qila age kobol eundec haun toodu odocnu cain cisdowain. <sup>15-16</sup> Anut age wele utaaden uqa gun, uqana kobol cunug eu tutuc bahic. Anutna jaqec je odi madena:

“Ija gun biligina eunu ageha gun bileiga,” ena.

*(Wok Pris 11.44-45; 19.2; 20.7)*

Eunu age Anut himec toodoiga, age Anutwe agena coboc cunugna gun bileiga.

*Anut uqa fajec ameg ben bahicna ege ceseli fajigen*

<sup>17</sup> Age Anut utadudu madogina, “Memige,” dogina. Memige eu uqa ege ijanigecafo, ijanigeca qeefo ec qee cisdona. Uqa ege dana osolosol cunug egena odoc himec ihocihoc gesiligina. Eunu age saen maha ina bilegina euna age gaid Anutnu cumunii coboigale. Age dogina, maha i agena jobon gug qee. <sup>18</sup> Age dogina, wele age kobol caunca qee age jajanagailnadec oin eu

toodoloig. Euqa Anut uqa age ceseli fajadime i kobol eunadec cagasaden. Odocob Anut uqa mahadec ceteh qee mena eu silwa goldca cinigwe euna qee ceseli fajadel. <sup>19</sup> Uqa Krai golacna ceseli fajaden. Golac eu ihanec meca bahic, meen qaigna fajecnu ihoc qee. Krai uqa sipsip haun oso uqa hulufan osoca qee cinigwe age Anutnu ihanegina.\* <sup>20</sup> Anut maha qee ifanec ninijen uqa Krai cabi i ugiannu nesili ehuden. Odocob qila cit qoc saen ina Anut uqa odudeceb Krai uqa age cesuladigiannu camasac men. <sup>21</sup> Anut uqa Krai cal mecnadec tulidocob cajen. Odime i binan fuladocca uten. Krai uqa age cesuladeceb age Anutnu wawaga meleen. Eunu age Anutnu wawaga meleena, odocob age Anut cahahaadigiannu sumudi bilegina.

*Age wawaga meleec cotogailnu nalunuga meigale*

<sup>22</sup> Age mele je i toodu odogina, odocob age kobol euna agedodoc wawaga wasacudecebil Anut amegna cataniec bilegina. Odocob age wawaga meleec cotogailnu nalunuga megina. Age cotogail ononu nalug mecebmecebecnu gagadic odoigale. <sup>23</sup> Ge, age haun wasein, eu odiwe sab cabina haun wasadena. Euqa sab aig qee mena eu age eunadec qee waselein. Sab aig gaid bilina eunadec dih age wasein. Sab aig eu Anutna je. Eu

---

\* **1:19:** Isrel age sipsipfo, dool osofo Anutnu ihanecnu ehadi leinna agena loo je maden, "Age sipsip me bahic hulufan osoca qee eu himec ihanecnu ehi leiga," en. Age Wok Pris 22.17-25 feiga. Pita uqa loo je eunu cisdumei maden, "Krai uqa sipsip haun oso uqa hulufan osoca qee cinigwe age Anutnu ihanegina," en.

uqa cebac bilecca, eu gaid bilina. <sup>24</sup> Ge, Anutna jaqec je eu odi madena:

“Gigi eu galalimei qee mena, uqana bobog eu cagasi tonena.

Dana cajaca cunug age gigi cinigwe mahuc qee megina.

Age binanaga eu bobog cinigwe cagasi tonena.

<sup>25</sup> Euqa Tibudna je eu bileceb catanena,” ena.  
(*Aisaia 40.6-8*)

Tibudna je eu me je dana age qasali maadein.

## 2

### *Tibud uqa meen me cinigwe cebac bilecca*

<sup>1</sup> Age haun wasein, eunu age kobol me qeeca qauadec kobolca cunug culeiga. Age me hihi leeig me qee odocnu cain odowain. Age osona cete h ocnu cain cisdowain. Age oso hibilemega je me qee cain madowain. <sup>2</sup> Ege doqona, mel momodo age su sugudocnu gale adena. Eu odiwe ageha mel momodowe age su cataniec Anutnadec sugudocnu gale adeiale. Su eu Anutna je, eu age dolonoga cesuldocob ben mimei cebac bilec haun Anut aden euna duuec tawigian. Odime age Anutca me bilecebil cahahaadigian. <sup>3</sup> Ge, Anutna jaqec je odi madena, “Age ege Tibud kobol mena odigen eu wele tebandoin, odocob age Tibud uqa me ec fein,” ena.

<sup>4</sup> Tibud uqa meen oso cebac bilecca cinigwe. Dana age uqa fimeig eu me qee ec cisdumeig uqa hibemdoin. Euqa Anut uqa wele nesili ehudimeig uqa me ec cison. Eunu age Tibudca hoigale.

<sup>5</sup> Ageha age meen cebac bilecca cinigwe. Odocob

Anutna Kis uqa age meenwe umei Anutna jo cehi-  
giannu gale dona. Eunu age Anutna Kis culdece-  
bil uqa Anutna jo age cebac bilec meenwe mudec  
euna cehimei uqa jo euna biligian. Odocob age  
Anutna jo euna age Anutna nawel tawec ihanec  
dana gun bilimeig age ihanec Anutna Kis gale  
dona eu Anut utuqagan. Age odi odocobil Anut  
uqa Jisas Kraiss umna cisdumei ihanec eu ocnu  
gale bahic dugian.

<sup>6</sup> Ge, Anutna jaqec je odi madena:

“Feiga, ija meen oso eu noh gug cudunna cehi-  
gennu nesili ehudem.

Meen eu me bahic, eu qaigina fajecnu ameg ben  
bahic.

Ija meen eu Saion Aluhna mudigen.

Dana oso uqa uqanu waug meleigia eu uqa majag  
qee doiaun,” ena. *(Aisaia 28.16)*

<sup>7</sup> Age dana cajaca wawaga meleena eunu Kraiss  
uqa meen me bahic. Euqa dana cajaca age  
wawaga qee meleena eunu Anutna jaqec je odi  
madena:

“Meen oso meen gel cehec memei dana culein eu  
qila meen jo big gug jo hehdocnu tawena,”  
ena. *(Buk Song 118.22)*

<sup>8</sup> Odocob

“Meen eu dana cajaca agena jicna caleceb age  
qeti aqecb toni aqigian,” ec Anutna jaqec  
je oso madena. *(Aisaia 8.14)*

Age Anutna je tefacdogina eunu meen eu age  
jaimaga qeti qocob age toni aqena. Age eu odi  
odoqagan ec Anut uqana cisdoc wele toodumei je  
maden.



9-10 Euqa age Anutna dana cajaca hatu ilagna bilegina eu wele age Anutna waug qoc qee oloin. Odimei age dana cajaca gauc bilein. Qilaqa age Anutna waug qoc eu oin, age Anutna dana cajaca bahic bilegina. Age Anut kobol me cunug uqa age odadennu qasali madoqagannu wele nesili cedaden. Qila age Anutna dana cajaca sihul bilegina. Age kingna nawel tawec ihanec dana bilegina. Age dana cajaca gun bilegina. Uqa age utaadeceb age tuca wele bilein eu culecebil uqa age ehadeceb age uqana fulacdoc me bahicna dunuh hoin.

*Ege Anutna cabi danawe bileqan*

11 O wawige meleec cotiel ija nalunuga migina, age cele dana jobon filnadec cinigwe odi age jag maha ina bilegina. Eunu ija niniadi maadigina, age wawaga hilahna gale adec me qee age dolonoga gami cadegina eu cunug hibemdoiga.

12 Gadgad haiden age agenu age dana cajaca me qee ec madowainnu. Age agena me odoc fifeig age Anut uqa dana cajaca cunug gesiladecnu deel hocob Anut binan suluqagan. Eunu age haiden dana cajaca gemona tutuc coboigale.

13 Age Tibudnu cisdudu bibileig dana agena gabman cunug agena loo je toodu odoiga. Age Rom agena king uqa dana cajaca maha cunugna bilegina agena ilo eu uqana je toodu odoiga.

14 Uqa uqana cofadec cabi dana suladeceb maha cunugna limeig age dana cahuldoc kobol odogina eundec ameg me qee wadacadegina, odocob age dana kobol tutuc odogina eundec binanaga sulegina. Eunu age uqana cofadec cabi dana age

maha nahanaha cofadegina euha agena je toodu odoiga. <sup>15</sup> Ge, age kobol tutuc dih odogina eu Anutna gale doc. Age odi odocobilfi age dana docca qee agenu je me qee madegina eu conoga cufa quadoqagan. <sup>16</sup> Age besiadec danawe odi coboigale. Euqa age ege besiadec dana eunu ege qisol mec kobol odeqan ec cain cisdownain. Age Anutna cabi danawe odi coboigale. <sup>17</sup> Age dana cunug ijanaga saolal mudeigale. Age wawaga meleec cotogail nalunuga meigale. Age Anutnu cumuneigale. Age Rom agena king binan suleigale.

*Ege Kraiss toodumeb culumen dain gec sogoecca gahidoqan*

<sup>18</sup> Begabeg meh cabi dana age agena cofadecnu jogoi jejenega toodoigale. Age cofadec me wawaga jocosagca himec jejenega cain toodowain qa age cofadec age cilehadegina euha jejenega toodoigale. <sup>19</sup> Ge, age Anutnu cisdudu cocobobil uqa agena cisdoc dado mudigian. Odocob cofadec me qee odadegina age dain adec gahidocobilfi Anut uqa kobol eu gale dugian. <sup>20</sup> Ge, age kobol me qee odocobil age qisaaadebil age dain adec gahidocobilfi kobol eunu adi cesuladigian? Euqa age kobol tutuc odocobil age qisaaadegin age dain adec gahidocobilfi eu Anut amegna kobol me bahic odogina.

<sup>21</sup> Ge, age Kraiss jaih ceen toodoqagannu uqa agenu sogoen. Uqa eu odi odonnu uqana kobol eu age ihacaden. Eunu Anut uqa age kobol i toodoqagannu wele utaaden. <sup>22</sup> Anutna jaqec je oso Kraissnu odi madena:

“Uqa silail oso qee mel.

Dana oso uqa conadec uhulec je oso qee dah  
melein,” ena. *(Aisaia 53.9)*

<sup>23</sup> Age uqa cewudec je madoin saen euna uqa  
cewudec jena qee wadacduadel. Uqa culumen  
dain doc sogoecca gahidon saen euna uqa dana  
me qee wadacadigian ec je oso qee madel. Euqa  
uqa uqadodoc cebac bilec cunug Anut ebenna  
men, Anut uqa Tutuc Gesilec. <sup>24</sup> Krais uqa ege  
silail cunugnu hibemdumeb ititom kobol himec  
toodumeb cebac bilecnu eunu gale don. Eunu  
uqa uqadodoc egena silail dewegna gahidumei  
na babalecna cal men. Age uqa deweg tudoin,  
odocob uqana culumen dain doc sogoeccana uqa  
ege haun me migen.

<sup>25</sup> Age wele sipsipwe agena jic culein. Qilaqa  
age sipsip ceseli agena cofadecca hoginawe age  
dana uqa age cofadena. Uqa age dolonoga cof-  
dona, age uqaca ceseli hoin.

### 3

#### *Aidagail gemugailcanu je*

<sup>1-2</sup> Eu odiwe aidagail age gemugail leih age  
Anutna je qee toodogina eu age aidagail agena  
jejenega toodu odocca agena coboc cataniecca eu  
fimeig aidagail age je oso qee madecna gemu-  
gail age agena silailnu tului falicdumeig wawaga  
meleigiannu age gemugailnu jogoi jejenega toodu  
odoigale. <sup>3</sup> Euqa age dewenega ganac dih bala  
cain faldowain. Caja leih age gosiniga galeca  
bahic luc cubusegina, leih age gold balaca fal-  
dogina, leih age lotoc me bahic taqegina. Age odi

cain. <sup>4</sup> Euqa age wawaga dunuh bala faldocobilfi eu me bahic. Bala faldoc eu calua mecwe qee, eu wawaga susumulca, eu wawaga malolca bilec. Kobol eu Anut amegna me bahic. <sup>5-6</sup> Ge, caja gun age wele bilein eu Sera cinigwe age agena cebac bilec Anut ebenna mudimeig age ceteh me bahic Anut adigian ec maden eu ocnu sumudi bilein. Caja gun eundec age kobol me bahic eu bala faloloig, odocob age gemugail jejenega toodoloig. Sera uqa Ebrahim jejeg todoloji, odimei Ebrahim madoloji, “Ijana meca,” doloi. Age qila ceteh osonu qee cucuiifeig, kobol tutuc odifeig, age Sera ategul bilegina.

<sup>7</sup> Eu odiwe age gemugailha agena inondoc cahacdoiaunnu age cisdoc me umeig age aidagail gami me bileigale. Ge, cajaha Anut uqa eeladec uum adeceb cebac bilec catanec oqagan ec age dogina. Cajaha age Anut huqanehul. Euqa caja dewenega eu gagadicca bahic qee, eu dana dewenega wooldoc qee. Eunu age aidagailnu kobol mena odadeiga.

*Ege dana cajaca cunug kobol mena odadeqan*

<sup>8</sup> Qila ija je i edi qee mudigen odigina. Age cunug cisdoc osolca wawaga osolca bileigale. Age osona culumen sol meigale. Age wawaga meleec cotogail cunugnu nalunuga meigale. Age osonu wawaga qoiale. Age cotogailnu jogoi coboigale. <sup>9</sup> Anut uqa age uqana eeldoc oqagannu gale don. Eunu uqa age kobol cunug eu odoqagannu utaaden. Eunu dana age kobol me qeena odadecebilfi age ameg me qeena cain wadacduad-owain. Odocob dana age je me qee maadecebilfi

age je me qee cain wadacduadowain. Eu odi qee, age Anutna eeladec mugumuga oqagannu age Anut uqa dana eu eeladigiannu inondoigale.

<sup>10-12</sup> Ge, Anutna jaqec je odi madena:

“Tibud uqa ameg eu dana cajaca ititom eundec feciadena.

Odimei uqa gaid age inondoginanu dahig cehena.

Euqa Tibud uqa dana qisol mec kobol odogina eunu cagucag tawena.

Eunu dana oso uqa uqana bilec me bahic cali-  
giannu waug nijcebfi,

uqa saen me bahic figiannu cisdufei,

uqa je me qee cain madeiaun,

uqa uhulec je madecha hibemdoia.

Uqa qisol mec kobol cunug hibemdumei kobol tutuc odeiale.

Uqa malol bilec walimei eu toodoiale,” ena. (*Buk Song 34.12-16*)

*Ege kobol me odoqonanu dain gec gahidoqan*

<sup>13-17</sup> Age tutuc odocnu megameg mifeig in uqa age me qee odadigian? Euqa Anut gale donafi age tutuc odoc eunu culumen gahidoqagan eu me. Eunu age kobol tutuc odimeig eunu culumen gahidufeig age ceeleiga! Euqa age cahulec odoc eunu culumen gahidoqagan eu me qee. Anut uqa dana age, age Kraisna kobol me toodogina eunu je me qee maaadi bulamadifeig age je me qee maadec eunu majanaga adigiannu gale dona. Eunu

“age dananu cain cucuiadowain, age cain jaen aqeiaun,” en. (*Aisaia 8.12*)

Euqa age Anut amegna wawaga tutuc biliale. Odocob age wawagana Kraiss cuhanuc agena Tibud mudecebil bilia. Dana age ceteh me i age ocnu susumudi bileginanu, gug doqagannu sisiladecebilfi age saen gaid je wadacduadoqagannu saciadoiga. Odocob age wawaga joco-saigca dana agenu lal qu bibileig je wadacdu maadeiga.

*Kraiss uqa egena silail cagasigecnu cal mimei haun cajen*

<sup>18</sup> Age Kraissnu cisdoiga, uqa dana ititom. Euqa uqa dana cajaca ititom qee cunug agena cudun umei hehuladen. Odocob uqa dana cajaca agena silailnu cagasiadimeis ehadimeis Anutca lecnu cal men. Kraiss uqa mahana cocobi dana bilen. Odocob dana age deweg tudocobil cal men. Uqa saen osolna dih cal men, uqa haun qee cal meiaun. Euqa Anut uqa tulidocob haun cajen. Qila uqa sao jobon kis deweg on bilia. <sup>19</sup> Odimeis uqa kis deweg bibileis nuimeis kis\* age gihacdoc jona bilegina eu me je qasali maaden. <sup>20</sup> Kis eu age wele Noa uqana saen euna Anutna je tefacdois. Noa uqana saen euna qisol mec kobol

---

\* **3:19:** Grik je doc dana leih age kis eu dana cajaca age Noana saenna cal mein eu age dolonoga ec cisdogina. Euqa cisdoc i culumen osoca. Anutna jaqec je cunugna "kis" je eu dana cajacanu qee madel, eu buga me qeenu himec madena. Odimeig doc dana leih age kis eu ensel me qee age Anutna je hibemdois ec cisdogina. Juda age Anut uqa Noana saenna kis me qee eu gihacaden eunu wawaga meleen. Euqa cisdoc i melefi Noana saenna ensel age danawe caca ocobil ageca nijein. Odocob ha Jisas uqa saen osona ensel me je qee qasali maadel.

ben wasecnu odon qa Anut uqa dana cajaca ameg mahuc qee wadacadel. Uqa susumudi lili Noa uqa uqana wag ben mudi hedon. Odocob sihul nag oso, eu dana cajaca 8-pela himec, wag ben tobimeig dunuh lein. Odocob wa sil ben cajimei wag eu u suldocob basai cobon. Odocob Anut uqa dana cajaca 8-pela eu wana cahahaaden. <sup>21</sup> Anut uqa qila wa joadecna cahahaadena eu odiwe uqa dana cajaca 8-pela eu wana cahahaaden. Eunu wa eu wa joadec qila cahahaadena eu hahunwe. Wa joadec eu age dewenega gegehini cusi qelecnu qee nijel. Wa joadec eu age Anut amegna cataniec biluqagan ec qeel qeti madein. Anut uqa Jisas Krai tulidocob cajen eunu uqa wa joadecna cahahaadecnu ihoc. <sup>22</sup> Jisas Krai uqa sao jobon ten, Anut eben meulana isec bilina. Odocob ensel cunugca, kis gagadic odoc cunugca, ceteh cunug gagadic odocca eu age Jisas Krai bisalu bilegina.

## 4

### *Ege wawige hilahna kobol culeqan*

<sup>1</sup> Krai uqa dewegna dain sogoecca gahidon. Odocob oso uqa dewegna dain sogoecca gahidon eu uqa silailna kobol eu wele culen. Eunu ageha jic euna dih uqa cisdonwe age cisdoc eundec gagadicca heweiga. <sup>2</sup> Ge, gug eunu qila saen ina maha ina bilecnu age dewenegana bibileig age dana agena gale adec me qee dana odogina eundecna cain biluwain. Age Anut gale docna bileigale. <sup>3</sup> Ge, wele age haiden dana kobol me qee odocnu gale ben adoloi euna ihoc bilein. Agena bilec eu wal kobol majanagaca qeeca, eu

gale adec me qeeca, eu ceu jecobil dalul aqecca, eu ja qoqoig dana age cajaca nijegina euca, eu kadan tibud cuha fecca. <sup>4</sup> Qila age haiden dana agena kobol me qee cunug odogina eundec qee gabanadecebil odoginanu haiden filicitadegina, eunu age deweneganu je me qee maadegina. <sup>5</sup> Euqa Gesiladec Ben uqa dana cajaca cebac bileginaca dana cajaca cal mein eundecca gesiladigiannu saciaddon bilia. Eunu haiden dana age Gesiladec Ben eu uqa amegna tawimeig age ege eetanu kobol me qee odom ec madoqagan. <sup>6</sup> Ge, gug inu Kraiss uqa dana cajaca cal mein euha me je qasali maaden.\* Anut uqa dewenegana gesiladeceb age danawe cal mein euqa age kisna Anutwe cebac biluqagannu me je qasali maaden.

*Ege bagol igec Anut igen euna me odeqan*

<sup>7</sup> Ceteteh cunug qee migiannu gadac saen eu wele cemenug nijia. Eunu age dumanaganu cisdu cuhadumeig fogo adeiale. Odimeig gaidgaid inondoiga. <sup>8</sup> Age wawaga meleec cotogailnu nalunuga mifeig age agena silail matinu dahiniga celigian. Odocob age cotogailnu nalunuga mecnu kobol eu kobol leih cunug wooladec. Eunu nalunuga mec eu gagadicca heweigale. <sup>9</sup> Age cotogail agena loo jona hocobil bilegina eu age loo adegina eunu cain wawaga me qee meiaun. Age loo adimeig cofadi cuhaadeigale. <sup>10</sup> Age

---

\* **4:6:** Grik je i gug lecisca nijia. Falicdoc je oso eu odi, “Krais uqa dana cajaca cal mein euha qee cal mec saenna me je qasali maaden.” Falicdoc je oso eu 3.19 toodona eu odi, “Krais uqa dana cajaca cal mein euha cal mec cudunna me je qasali maaden.”



cunug cabi ocnu dumanaga adec filfil Anut adeceb oin. Eunu dumanaga adec euna age cotogail cesuladecnu cabi oiga. Kobol euna age Anutna dumanaga adec filfil ila mecnu cabi dana me biluqagan. <sup>11</sup> Oso uqa Anutna je madecnu duman uteceb on uqa Anutna je tutuc madigian. Oso uqa cesuladecnu duman uteceb on uqa dana cajaca cesuladecnu cabi eu uqa Anut gagadic odoc uten euna cabi ugian. Eunu dana age ege ceteteh cunug odoqona ec fimeig age Jisas Kraiss umna Anut binan suluqagannu kobol eu odoigale. Uqa binan fulacdocca, uqa gagadic odocca gaidgaid biliale. Mele.

*Ege Kraiss dain sogoecca gahidonwe odi dain sogoecca gahidoqona eunu ceeloqale*

<sup>12</sup> O wawige meleec cotiel ija nalunuga migina, age temadec jaca ageca hocob eunu cain filicituwain. Temadec eundec ageca hocob eu ceteh fil oso bahic ec cain cisdownain. <sup>13</sup> Temadec euna age Kraiss uqa dain sogoecca gahidonwe ageha Kraisca osoben dain sogoecca gahidogina, eunu age ceeleigale. Odocob hibna Kraiss uqa gagadic odoc fulacdocca camasac migian saen euna age wawaga me bahic bileceb gehca ceeloqagan. <sup>14</sup> Kis gagadic odoc fulacdocca eu Anutna Kis eu ageca bilina. Odocob age Kraiss ijan hewegina. Eunu dana age eunu je me qee maadecebilfi age cois ceeloqagan. <sup>15</sup> Euqa gadgad age gemona dana oso uqa dana qagadocob cal menafo, oso heje onafu, oso cahuldonafu, oso dana leih agena cetehnu gugca mecieei cobonafu eunu ameg umei sogoeiaunnu. <sup>16</sup> Euqa age eundec oso uqa Kristen,

eunu sogoifei uqa cain majag doiaun qa Kristen ijan euna uqa Anut binan suliale.

<sup>17</sup> Ge, gesilgec sanan mecnu saen wele dodoldona. Odocob Anut uqana dana cajaca eu age casac gesiladigian. Anutna gesiladec eu egeca sanan mecebfi dana cajaca age Anutna me je eunu wawaga qee meleena eunu adi odigian?

<sup>18</sup> Odocob Anutna jaqec je odi madena:

“Dana ititom eundec cahahaadecnu cabi bahicfi, dana age Anut hibemdumeig silail kobol odogina eu agenu qa adi tawoqagan?” ena.  
(*Sindaun 11.31*)

<sup>19</sup> Eunu dana age Anutna gale docna sogoegina eundec age agena cebac bilec Anut ebenna mimeig tutuc dih coboigale. Ge, Anut uqa ege ifani migen, odocob uqa gaid ege me bahic cofgena.

## 5

### *Tamanec cofadec age Anutna dana cajaca cofadi cuhadoigale*

<sup>1</sup> Qila ija tamanec cofadec matu odi maadigennu odigina. Ijaha ageca osoben tamanec cofadec. Odocob ija amigulna Krai culumen dain doc sogoeceb fem. Odocob ijaha age gami osobenca gagadic odoc fuladocca hibna camasac migian eu oqan. Eunu cofadec age cabi odi oqagannu tuliadigina. <sup>2</sup> Age Anutna dana cajaca cofadi cuhadoigale, age age ebenegana sip-sipwe bilegina. Age meen qaig ocnu dih cabi i cain owain. Odocob age cabi i oqagannu dana leih agena gale adecna toodumeig cain odowain. Euqa age Anutna cisdoc toodu cabi i oqagannu

gale adeiale. Age cabi i ocnu megameg mimeig cabi u cuhadoigale. <sup>3</sup> Age dana ben cinigwe bibili bileig Anutna dana cajaca Anut uqa age ebenegana men eu cain cilehadowain. Euqa age kobol me odadoqagan, odocob age dana cajaca jic ihacadecebil toadoqagan. <sup>4</sup> Age odi odocobilfi sipsip cofadec meca uqa camasac caleceb saen euna age king katakat gagadic odoc fulacdocca dana cajaca ititom oqagan eu ageha oqagan. King katakat eu ameg me bahic, eu qee qee meiaun.

*Ege egedodoc Anut ebenna meqan*

<sup>5</sup> Eu odiwe dana haun ha age tamanec cofadec matu bisalu bileigale. Ge, Anutna jaqec je odi madena:

“Anut uqa dana ege binanige suli oqan egina eundec hewadeceb nag megina.

Euqa dana wawaga lal qu jogoi cobogina eundec uqa eeladec uum adena,” ena. (*Sindaun 3.34*)

Eunu age cunug agedodoc jogoec kobol umeig cotogail bisalu bileigale. <sup>6</sup> Anut uqadodoc uqana saen mena age u suladeceb ohis toqagannu gale dona. Eunu agedodoc agena gale adec eu cilehdoigale. Odimeig Anut eben gagadic odocca bisalu bileigale. <sup>7</sup> Anut uqa agena culumen dain adec sogoecca cunug gahidogina ec dona. Odocob uqa me cofadena. Eunu age agena culumen dain adec sogoecca cunug eu uqa ebenna meigale.

<sup>8</sup> Agena cad, Seten, uqa laion osowe gehca euii taliladi cobona. Uqa dana leih aqi jigiannu waladena. Eunu age dumanaga cofdu cuhadoigale. Age mecii cuhadoigale.

<sup>9</sup> Age wawaga meleecna duui tawimeig teidu wooldoiga. Ge, age dogina, age wawaga meleec cotogail mahamaha cunugna bilegina ageha culumen dain adec sogoecca eundec gahidogina eu odiwe age gahidogina. <sup>10</sup> Anut uqa eelgec uum igec cunug uqana gug. Uqa age Kraisca gabanadeceb age uqana gagadic odoc fulacdocca oqagannu utaaden. Gagadic odoc fulacdocca eu gaid biligian. Age culumen dain adec sogoecca saen gohicna dih gahidoqagan. Odocob hibna Anut uqadodoc age haun me madigian. Odimei uqa me madeceb tatawebil gagadicca biluqagannu hehadigian. <sup>11</sup> Anut uqa gagadic odoc euca gaidgaid biliale! Mele.

*Cit qoc feele adec*

<sup>12</sup> Sailas ebenna ija je gohic i jaqiadigina. Uqa ege wawige meleec cotige bahic ec cisdogina. Jaqec je ina ija kobol i Anut uqa dana cajaca cunug odadena eu uqana uum igec bahic ec cesusaadi maadigina. Anutna eelgec uum igec i mele bahic ec maadigina, age euna gagadicca taweigale.

<sup>13</sup> Tamanec uqa Babilon\* bilia euha Anut uqa wele nesili cedaden eu age feele adec sulduadegina. Odocob Mak, ija melami, uqaha feele adec sulduadena. <sup>14</sup> Age osolosol cunug wawaga meleec cotogail cotec nalug mecna cotdocobdocobeigale.

---

\* **5:13:** Saen euna Rom age Anutna dana cajaca aqecebil cal mein eu odiwe Babilon age wele bahic odi odoin. Eunu Pita uqa Babilon ec maden, euqa uqa je hahun oso maden. Dana age je hahun uqana gug eu Rom ec cisdogina.

Cunug age Kraisca gabanadec bilegina eu malol  
bilec ageca biliale.

**BAL CEHEC JE HAUN**  
**Genesis and the New Testament in the Amele**  
**language of Papua New Guinea**  
**Buk Stat na Nupela Testamen long tokples Amele long**  
**Niugini**

copyright © 1997 Wycliffe Bible Translators, Inc.

Language: Amele

Contributor: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

1997-01-01

---

PDF generated using Haiola and XeLaTeX on 21 Feb 2024 from source files dated 31 Aug 2023

efcfe8ba-c483-58bb-922c-05455e0b9491